



12. august 2013

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

Ineqarnermut politikki pillugu Naalakkersuisut apeqqutit.

(Inatsisartunut ilaasortaq Jens B. Frederiksen, Demokraatit)

Tunnqavilersuut:

Inuiaqatigiisugut nalinnaasumik sorsuutigaarput, inissiaatitta nungullarsimanerat. Pissutaavoq annermik ukiorpasuumik iluarsaassisimanninnerput inissiaatitsinnillu aserfallattaaliisimanninnerput. Inissiaatigut aserfallattaalinngippallaarsimavagut taamaattumik ilarpasui ajortilluinnarsimapput. Maannakkorpiaq inissiaatitta qanoq issusaat pitsaanngilaq.

Naalakkersuisut siuliisa 2012-mut Aningaasanut Inatsisissamut atatillugu inissiat pillugit nassuiaat saqqummiuppaat ilaqartoq ineqarnermut pilersaarummik, annertigut tassani pilersaarutigineqarpoq, inissaaleqineq iluarsaassinikkullu kinguaattoorutit iluarsineqarsinnaanersut. Tamanna tunnqavigalugu Naalakkersuisunut imatut apeqqutissaqarpunga:

1. Naalakkersuisut inissianut pilersaarut atulersaarpaat?

2. Ineqarnernermut Avatangiisinullu Naalakkersuisoq tusagassiutinut nalunaarummini oqarpoq iluarsaassinissanut aningaasaliissutit illut silataasa qalipannerannut aamma illup silataani listinut atorineqassasut tamakkiisumik iluarsaassisoqarani. Tamatumunnga tunnqavilersuutigineqarpoq illut silataasa isigiuminarsinissaat. Qanorli iliorluni Naalakkersuisup innuttaasut 4.500-t misaaniittut inissiani inillit peqqinnissaat tungiorneqarnissaallu qulakkeerniarpaq, Namminersorlutik Oqartussat inissiaataat pillugu Pissusiviusunut nalunaarummi allassimammat inissiat iluarsaattariaqanngikkunik isatiinnartariaqartut?

Naalakkersuisoqatigiit arlaleriarlutik oqaatigisarpaat inissialiortiternermut aningaasaliissutit Nuummiit sineriammut siammarneqassasut. Taama oqarput naak Namminersorlutik Oqartussat inissiaataat pillugu Pissusiviusunut nalunaarummi ersersinneqaraluartoq, inissialiortiternissamut iluarsaassinissamullu pisariaqartitsineq Nuummi, Sisimiuni Ilulissanilu annerpaasoq. Tamatuma pissutissaqalersippaanga imatut apernissannut:

3. Illuliortiternermut iluarsaassinermullu aningaasaliissutit illoqarfikkuutaatumik agguarneqalerpata aammalu aningaasat qanoq agguanneqarnissaat pilerpat Namminersorlutik oqartussat inissiaataat pillugit Pissusiviusunut nalunaarut Naalakkersuisut tunnqavittut atorniarpaat?



4. Nuummi, Sisimiuni Ilulissanilu inissaaleqisut Naalakkersuisut qanoq aaqqiiviginiarpaat aningaasaliissutit ikilisinneqassagaluarpata?

5. Naalakkersuisoqatigiit neriorsuinikuupput minnerunngitsumik Nuummi angerlarsimaffeqanngitsut pillugit ajornartorsiutit iluarsiivigiumaarlugit. Naalakkersuisut tamanna qanoq iluarsiiviginiarpaat inissialiortiternermut aserfallattaaliinermullu Nuummut immikkoortinneqartartut ikilineqassappata parlattuanillu nunaqarfanni avinngarusimasunilu annertusiliillutik taamaasippammi Nuummi inissaaleqisut amerlinissaat naatsorsuutigisariaqassammat?

Alla Naalakkersuisoqatigiinnit neriorsuutigineqartoq ersarissumik tassaavoq Namminersorlutik Oqartussat inissiaataannut attartornermut akiliutigineqartartut apparneqarumaartut. Taamatut neriorsuuteqarneq uissuumminarpoq ukiorpasuuminimi Namminersorlutik Oqartussat inissiaataasa pisariaqartinneqartut naapertorugit aserfallattaalinissaat akissaqartinneqartarsimangilaq attartornermut akiliutip appasittumiitneqarsimanera pissutaalluni. Tamanna neriorsuut Naalakkersuisoqatigiit suli piviusunngortinngilaat aamma tigussaasumik suli oqaatiginikuunngilaat appartitsinissaq qanoq takorloorneqarnersoq. Tamanna tunngavigalugu Naalakkersuisut imatut apererusuppakka:

6. Procentinik qassinik attartornermut akiliut appassava aamma attartornermut akiliummik appaneq kikkut akilissavaat?

7. Qanoq iliorlutik Naalakkersuisut Namminersorlutik Oqartussat inissiaataasa piffissap ingerlanerani aserfallattaalinissaat qulakkeerniarpaat, kinguaatta inissianik aserorluinnarsimasunik tigusinissaat pinaveersaartinniarlugu?

Ineqarnermut Avatangiisinullu Naalakkersuisoq tusagassiutinik katersortitsinermini oqarpoq, Namminersorlutik Oqartussat inissiaataa isaternissaat suliffissaaleqisunut suliaritissasoq, suliffissaaleqisut nungusarniarlugit. Neriorsuutip tamatuma uissuumminartup pissutissaqartitsilerpaanga imatut aperinissannut:

8. Sulitisininut peqatigiiffiit sulisartullu kattuffiit, suliffiit pioreersut suliassaannik suliffissaaleqisut suliaqartittalernissaat pillugu Naalakkersuisut tusarniaanikuuppat?

9. Sanasut allallu ilinniarsimasut suliffitik annaassavaat, suliarisartagaat suliffissaaleqisunit tiguneqarpata?

10. Kiap isaterinerit akisussaaffigissavai aqullugillu aamma qanoq iliorluni qulakkeerneqassava sullivimi avatangiisit pillugit malittarisassat malinneqarnissaat?

Apeqqutit akeqquneqarput tiguseraniit ullut sulliviit nalinginnaasut qulit qaangiutsinnagit.